

SASTANAK PODODBORA ZA VODOSNABDIJEVANJE I ODVODNJU UPKP FBiH

U Sarajevu je 19.02.2020. godine uspješno održan sastanak Pododbora za vodosnabdijevanje i odvodnju UPKP FBiH, na kojem su bili prisutni direktori i/ili izvršni direktori JKP, ukupno 33 Vodovodnih JKP iz Federacije BiH.

Projekat „Regionalna mreža za razvoj kapaciteta za usluge vodosnabdijevanja i odvođenje otpadnih voda“ (RCDN), usmjeren je na povećanje efikasnosti vodovodnih JKP na Zapadnom balkanu, dajući doprinos boljem pružanju usluga u cilju da veći broj grupa stanovništva dobije pristup uslugama pitke vode i odvodnje, te da bi se zadovoljila pravna stečevina EU za okoliš.

RCDN daje izvrsnu priliku za umrežavanje i otvaranje novih tema na području vodosnabdijevanja i odvodnje u zemljama regiona.

Razvoj kapaciteta putem RCDN-a pruža raznovrsne formate usmjerene na razvoj kompetencija kroz obuke, studijska putovanja i druge obrazovne platforme, organizacionu podršku kroz savjetodavne usluge i razmjenu iskustava, kao i podsticanje saradnje kroz dijalog ključnih aktera.

Ovo je prilika da se ukaže na potrebe kako da se stvore određeni mehanizmi kojima će se znanja i iskustva stečena tokom trajanja projekta iskoristiti za kreiranje i daljnji razvoj ove djelatnosti, kako na lokalnom nivou tako i cijeloj Bosni i Hercegovini.

Cilj sastanka je bio upoznati odgovorne osobe sa rezultatima analize nakon provedene TNA ankete, postići razumijevanje kod Pododbora (vodovodnih preduzeća-članica UPKP FBiH) o budućim planovima, veće uključivanje članica u aktivnosti Pododbora, unapređenje participativnog pristupa, kratko predstavljanje segmenata Biznis plana UPKP FBiH koji se tiču vodosnabdijevanja i odvodnje otpadnih voda i pregled planiranih i ostvarenih aktivnosti u proteklom periodu.

Diskusija je moderirana i strukturirana prema prezentiranim temama: Presjek strateškog plana, pregled rezultata TNA analize i mogućnosti organizacije CD mjera u narednom periodu kroz RCDN projekat i izrada akcionog plana u oblasti pružanja treninga za 2020. godinu.

Učesnici sastanka su podijelili svoja iskustva sa dosta aspekata, a moderator je potaknuo diskusiju u razmjeni iskustava, fokusirajući se na rezultate iz analize i odgovarao na pitanja prisutnih.

Poslije diskusije i provedene ankete Akcionog plana razmjene iskustava među jednakima usvojeni su sljedeći:

ZAKLJUČCI

1. Da se u narednom periodu organizuju dvije jednodnevne radionice na teme: Upravljanje imovinom - Asset Management, koja je prioritet, i ovu radionicu organizovati zajedno sa Savezom općina i gradova FBiH u periodu maj-juni 2020.g., i na temu Neprihodovana voda – NRW.
2. Učešće trebaju uzeti direktori i/ili izvršni direktori u JKP, a Ured UPKP FBiH će blagovremeno obavijestiti članice.
3. Prije održavanja radionica potrebno je organizovati jednodnevni sastanak Pododbora za vodosnabdijevanje i odvodnju za pripremu ovih radionica.
4. Razmjena iskustava među jednakima za uspješne infrastrukturne projekte prikupljanja i prečišćavanja otpadnih voda, organizovati krajem tekuće godine.
5. Polugodišnje radionice se mogu planirati do kraja godine u zavisnosti od drugih aktivnosti.